

# Filipai

## *Yaizézé ac.*

<sup>1</sup> Yesu Kristoac welenj qeque icya Paulo zéma Timoteo niri hénarinj Kristo Yesuac qeriaiguc Filipi ama areña yandaiguc kecanzu ini zéma galenj hécgina zéma ai ichécgina onacmuru kiwi yomi oma haiwa hazac. <sup>2</sup> Anutu mañgocnina zéma Miñ Kewunina Yesu Kristo iorarunec ewa hia zéma luaenénj hama onac muru hemac.

## *Pauloac zéwelec ac.*

<sup>3</sup> Ni niñqeli énécmianzua nalé imuac séc Anutuna ewa hia ac ézéanzua. <sup>4</sup> Zéwelecanzua séc ic tunj onac niñac wamma ségiségi wamma nalé séc zéwelec wañanzua. Imuac hénia imi yomuhuc; <sup>5</sup> Ini buña suruc hiabia niñgic nalé imuac hénihénia igucnec éréma deguc imuac ai imi nanjé amuma meanzu imuac mia imuhuc wañanzua. <sup>6</sup> Wañu sugcinaiguc ai hiabia héniyec Anutu inénj ai imi mézézéngéma metecgéguguc Kristo Yesuac nalé yanda imi hamac imi niñkinzénj gézua. <sup>7</sup> Ni hésa qatécnaguc wamma buña suruc hiabia imuac héipuc wamma zéseliwa ini ewa hiayawac qeriaiguc ai momachécna wañ néñanzu. Imuac niñac ni ic tunj onac imuhuc nimba sécgézac. Imuhuc nimba ini imi nuac ewa qerinaiguc kecanzu. <sup>8</sup> Yesu Kristo inénj ewa qerianénj wañ énécmianzac imuac séciguc ni dimuhuc onac niñac wamma

qerinanén hakhak wañanzac imuac mia Anutunén ni héipuc wañ nénzac. <sup>9</sup> Wañu ini niniñ hiñgac hiñgara zéma niñgésigési ginanén goi héihéigina imi mesaiyu kuaya qeçeya wammac imuhuc zéma zéwelecanzua, <sup>10</sup> Imuhuc wamma némac iwawainén héla wanzac imi niñtegicma solañanec kitic késpedes qahac kecgic Kristoac haha naléya imi hamac. <sup>11</sup> Wañu Yesu Kristonén qenané wañ énécmiyu kecec solañawac héla gocmianén sécgé énécmiyu Anutuac edamuya onac murunec qetagali énécmiyu tosara enen hémma Anutu mepé qepésiac legic héimimu.

*Pauloac zéwelecwelec ac.*

<sup>12</sup> Dacmuna hécnina haka hicñinéñec imuac niñac Miñ Kewuac buña suruc hiabia imi muñguc yanda saima kenzac imi ini niñtegicmu niñac wanzua. <sup>13</sup> Imuac Kristoac niñac wamma hésa qaténaguc keczua imi baec galeñac ai ama yomuac qeriaiguc owohotoñ keczu i zéma ic embac tosara moczoñ ionac sugcinaiguc wininiyu héñtegicdaczu. <sup>14</sup> Imuac niñac dacmuna hécnina sugcinaiguc sasalanén nuac hésa qaténa niñac Miñ Kewuninawac qeriaiguc ninzéngeña zénéngina ménda hiriyu Anutuac ackuazéc imi hañ qema zéanzu.\*

<sup>15</sup> Ic embac tosanenén nimbupuc wamma nogicna gogicba zéma Kristo zésaianzu, nén tosara imi ewa hélanén zésaianzu. <sup>16</sup> Yomi

---

\* **1:14:** Paulonén hésa ic kerec, nén Romawac baec galeñnéñ eeya héimiyu ziki sipac qahac kecma ackuazéc zéauénécmiyu hémma tosara enen acguc kucgina mema zénéngina ménda hiriyu buña suruc hiabia zéau énécmiañgic.

enej imi ni buŋa suruc hiabia imuac héipuc wamma zéasarimaŋ niŋac kumunéŋec hénia imi niŋtegicma siŋna nimma ai meanzu. <sup>17</sup> Waŋu tosara imi eneŋ hésa qaténaguc réwéri ménŋ toro-qewiŋ gezaŋ zéma ewa hélanéŋnec qahac, néŋ nogicna gogicba zéma Kristo zésaianzu. <sup>18</sup> Imuac némariawac hémba birimac? Ikoc me hélacnec imuhuc me imuhuc waŋgic saima keŋanzac imi Kristo imi mia. Hénia imuac niŋac ni ségiségi waŋanzua. Waŋu toroqema ségiségi wammanec kecmaŋ. <sup>19</sup> Imi mia hénia yomuhuc niŋac; Onac zéwelecgina zéma Yesu Kristoac Uŋa téréyanéŋ naŋgénéŋu zéra waiya imuhucya niŋac aŋgéh titina mihicŋimaŋ imi ni ninzua, imuac niŋac mia imuhuc waŋanzua. <sup>20</sup> Waŋu gamusiŋ qamusin ménda nimma becnec ésécnec degucmi acguc zénéŋna ménda hiriyu séwiiguc me humuciguc séwinanéŋ Kristo iwacnec sac mepési miman niŋ ninzua. <sup>21</sup> Imi mia nuaru imi kecmaŋiguc Kristoac kecmaŋ, waŋu humumaŋiguc humucna imi acguc méra némmac. <sup>22</sup> Waŋu séwinaguc kecmaŋiguc imi téré ainawac héla mihicŋimaŋ. Imuac niŋac kekec zéma humuc iorac suggiraiguc némariawac aŋgéh tiwa hia wammac imi ménda ninzua. <sup>23</sup> Ni imuac suggiraiguc kecba momacnec waŋ nénzaoc. Waima kemma Kristoguc kecmaŋ iminéŋ ogicogicya imuac niŋ imuac wanzua, néŋ <sup>24</sup> imi waima séwinaguc kecmaŋ imi onac niŋ nimba hia wanzac. <sup>25</sup> Waŋu ni waima kecmaŋ imi zéma onac ninzéŋ ninzéhina meyandima imuac zézé ségiségi wamma ic tuŋ iniguc momacnec kecmaŋac hezac imi ni niŋyacgézu. <sup>26</sup> Imuac

neŋ muŋguc hama iniguc kecba nuac niŋac Yesu Kristoac qeriaiguc onac zézé ségiségi ginanéŋ qesalecgéma yandimac.

<sup>27</sup> Momacguc niŋgic eeyaguc wammac imi yomuhuc; Ini Kristoac buŋa suruc hiabia imuac séciguc wamma kecmu. Imi mia ni ha inicmaŋ me wai énécmima lakec kecmaŋ imi ini ewa momac wamma namma ewa siŋgina momacnec buŋa suruc hiabiawac ninzéŋ ninzéŋginawac wamma eŋaoc naŋgé amumu. <sup>28</sup> Ionac muru imi buŋa suruc hiabianéŋ kisikiyoŋac asé kiwiya wanzac, néŋ onacmuru imi aŋgéŋ titiac asé kiwiya wanzac. Imuac niŋac ai imuac me imuac mewiŋ zégic hazéc waŋ énécmimuiguc ionac bac yandi yandi ménda wammu. <sup>29</sup> Kristoac niŋac ewa hia waŋ énécmiyec imi ninzéŋgé mimu niŋac sac qahac, néŋ ninzéŋgéma iwac niŋ wamma zérabéra acguc momacnec bisimu niŋac imuhuc zézuu. <sup>30</sup> Ini imi becnec nuac muru hicŋiyu héŋgicac deguc nuacmuru heyu héŋanzu qeŋzeŋ manzeŋ imuhucya onac muru acguc he énécmizac.

## 2

### *Kristoac memaamuma kekecac haka.*

<sup>1</sup> Imuac Kristoac qeriaiguc meme seli ai, me goi héihéiac qeri mebélac ai, me uŋa téréyawac ala kekec, me wésé niniŋ, me ewa biricnéŋ he énécmiyu <sup>2</sup> ewa momac wamma goi héihéi imuhucyanec aŋgéŋ tигic ewa siŋgina momac waŋu siŋniŋ momac wamma ségiségina solaniganigic kuaya qeŋeya wammac. <sup>3</sup> Ai imuac me imuac mewiŋ zé nogicna gogicba hakaiguc me

séwi enejawac hakaiguc ménda wamma ewagina memaamuma tosara ionac ningic gi gogicma eneja wammu. <sup>4</sup> Ini enac enac ewa singina sac qahac, néj alahécgina ionac ewa siñ imuac momacnec héngalen wañ énécmimu. <sup>5</sup> Yesu Kristoac ewa siñ heyec ewa siñ imuhucyanec angéñ tigic hemac. <sup>6</sup> Inéj Anutu enejawac kekec kerec, néj Anutuac séc angéñ tima kecman zé ménda nimma, <sup>7</sup> kilen memaamuma welen qeque ic tanec mema baec ic ésécnec wañec. <sup>8</sup> Imuhuc wamma ic tanec wamma hicñiyec. Hicñima eneya memaamuma kilen humucac séc keremma Anutuac ara niñtohoma ic héngena wéndaraiguc humuyec. <sup>9</sup> Imuhuc wañu Anutunéj ou meyacmima qac buña méj, qac tosara moczon onogiczac imuhucya miyu késayec. <sup>10</sup> Imuhuc wammima ou kurumeniguc zéma you baeciguc zéma emu baec bawaiguc kecanzu ieneñ moczon Yesuac qac buñaiguc simiñ héimimuac hezac. <sup>11</sup> Wañu kuaya kuaya séc Yesu Kristowac Miñ Kewuna zéma Anutu mañgoc mepési wammimu.

*Kifa asaha ésécnec kecbiñ.*

<sup>12</sup> Imuac ala soroc hécna wésénaiguc sac qahac, néj deguc iniguc ménda keczua nalé yomuac acguc nalé séc ara niñtohoma bac yandi yandi wammima zénéngina hiriyunec onac angéñ titigina imi mesolananimu. <sup>13</sup> Ewa qeriginaiguc ai meanzac imi mia Anutu. Inéj mia eneya ewa siña hiabia imuac niñ kewugina haima aigina memu niñac meseli énécmianzac. <sup>14</sup> Wañu ai hénia hénia imi mematiti me tualefic ac qahac memu. <sup>15</sup> Imi mia ini késpedes qahac solanec kecma hicñisai

qarinj qarinqia zéma acqeqe wawaņa ionac sugginaiguc Anutuac nambérac héra wamma solañanec kecma baec ic ionac sugginaiguc asac mararaņ wamma qetagali énécmima kecmu. <sup>16</sup> Kekecac ackuazéc measarigic ni usuņnec kenņa wamma qenzenj manzenj qeyi imi héra qahac ménda waņu Kristoac naléiguc qerinanéj niņpaņgéma onac niņac ségiségi ac zémaņac séc wammac. <sup>17</sup> Onac niņzėj niņzėjgina zéma welenj qegeginanéj mulu ésécnec haimigic ni imuaru toroqema nena kekecna mulu manaņac doku selia ésécnec qocgé mimaņiguc kilenj ségiségi wamma ic tuņ iniguc ségiségi wammaņ. <sup>18</sup> Ini imuhucyanec ségiségi wamma niguc momacnec ewa hia nimmu.

*Timoteoac ac.*

<sup>19</sup> Ni onac ac buņa nimba qerina meefi némmac zéma hénia imuac niņac Timoteo focdac onac muru méli énécmimaņ niņac Miņ Kewuninawac qeriaiguc niņkumu wamma kecanzua. <sup>20</sup> Niguc ewa momac wamma onac niņac wamma inicgalenj wammacac hezac imi tosara qahac, néj i sac nuacmuru keczac. <sup>21</sup> Ic tosara ienej imi Kristo Yesuac aiyawac ménda waņanzu, néj ejaņ ewa siņginawac wamma kecanzu. <sup>22</sup> Néj Timoteo imi merac méņnéj maņgocyawac wammianzac ésécnec waņ némma niguc buņa suruc hiabiawac kuc qema ai meyec. Imuac niņac ai hakayawac hénia imi wininiyu hémma nindaczu. <sup>23</sup> Imuac nuac muru haka dimuhuc hicņi némmac imi hémma niņtegicmaņ nalé imuaru focdac ic imi méli énécmimaņ zé niņkumuma keczua. <sup>24</sup> Ni

acguc focdac hamañ zé Miñ Kewuninawac qer-  
aiguc niñkumuma keczua.

<sup>25</sup> Wañu nimba Epaforodito onac muru méli  
énécmimañac hezac. Ic imi méli néngic hama  
dacmuna zéma ai momac zéma téngiñ ic ésécnec  
niñguc momacnec welenqe némma iwawai méñac  
méñ niñac wamba méra néñanzac. <sup>26</sup> Inéñ ini  
moczoñ inicmañ zé qeria héñgeñnec kerec. Wañu  
eñeyaoc hafi wamma kerec imuac suruc ini nin-  
dacgic imuac niñac ewa goro wamma kecanzac.  
<sup>27</sup> Inéñ hafi kiyu humumañ zé wañec. Wañu  
Anutunéñ wéséya nimmiyec. Wañu i sac qa-  
hac, néñ ewa goronéñ ewa goro méñ mihicñiwac  
niñac niñyewérima kecba wéséya niñnémma ewa  
gorona momacnec meefinéñec. <sup>28</sup> Imuac ini ic imi  
hémma ségiségi wañgic ewa qerina réwéria imi  
acguc momacnec meefimañ zé seliseli wamma  
méli énécmizua. <sup>29</sup> Imuac ini Miñ Kewuni-  
nawac qeriaiguc ségiségi yanda wamma ic imi  
héihéré mima ic imuhucya ionac imi eegina  
héima énépésimu. <sup>30</sup> Ini welenj qenémma ai  
megic ai tasia ménda sécgéma heyec imi meyu  
sécgédacmac niñac ic imi Kristoac ai niñac eñeya  
kekecyá ménda galenjë amuma humumañ zé hia  
humumañ zénimma ai meanjec.

### 3

<sup>1</sup> Dacmuna hécna ac tetcgiawac zéwa niñgic,  
Miñ Kewuninawac qeriaiguc ségiségi wammu.  
Ac imuacnec muñguc muñguc oma nimba imi  
nuaru ai yanda ménda wanzac, néñ onac imi ac  
iminéñ demin meénécmimac.

*Haka wahala maleku ésécnec hetecgéwiŋ.*

<sup>2</sup> Ini haséŋ kazu ic\* zéma biria meme ic zéma séwi taségina héricma séwi eŋeŋ wanzu imi onac galeŋgina mema kecmu. <sup>3</sup> Anutuac uŋa téréyaguc welenŋ qeŋe ai mema Kristo Yesu mepési mima séwiguc ménda héiselima kecanziŋ neŋaŋ imi séwi tasénina hélacnec héricma kekera wanziŋ. <sup>4</sup> Ni acguc séwiiguc héi selimaŋac séc waŋu ic tosia eneŋ séwiiguc héiseliwiŋac séc zéma ninzuiguc ni imi onogicma imuhuc nimmaŋac séc. <sup>5</sup> Ni hicŋima kecha ai meme <sup>8</sup> waŋu séwinaiguc séwi heric haka wannéŋgic,† waŋu ni Israelac sac kitiwa, Benzaminac qeli, Hebiraio ic suginaiguc Hebiraio ic héra, waŋu hénac aciguc koroma zéwa Farisaio ic wanzua. <sup>6</sup> Hakana imi seliseli wamma Yesuac hénacoriŋ ununesi waŋ énécmiyi waŋu hénac ac ménŋ ménda logima kápésic ménŋ ménda mihicŋiyi. <sup>7</sup> Waŋu becneŋ iwawai imuhucya moczoŋ nanŋé néŋec, néŋ Kristoac wamma nimba iwawai imi ménŋ ménda méra néŋec, néŋ iwawai eŋomia waŋec. <sup>8</sup> Waŋu hélacnec zéwa iwawai imi moczoŋ maŋeŋ qeya mihicŋi nénéŋa, néŋ miŋna Kristo Yesuac hénac niŋasariwa hicŋinéŋec ninŋ imuac mia nimba eeya eŋeŋaguc wanzac. Ni imi iwac niŋ wamma iwawai moczoŋ imuac nenesic zéma ninzua. Imi mia Kristo aŋgétiwa <sup>9</sup> iwac qeriaiguc mihicŋi nénéŋa wammac niŋac. Solananima

---

\* **3:2:** Yuda ic ionac haka silic méndacaniŋ ic eneŋ Kristo ic tosara ionac haka silic ménda méndacniŋ mebiric énécmiaŋgic hénac imuac niŋac kazu ic zéénécmiyec. † **3:5:** Yuda ic eneŋ nalé imuaru nanŋécgina séwi hericheric haka imi waŋ énécmigic.



keczua imi hénac ac igucnec ménda hicñiyec, néñ Kristo ninzéngeña kekec solañña imi Anutuac murunec hicñinéñec. <sup>10</sup> Ni Kristo zéma humuc igucnec qelima kekec imuac kuha zéma iwac qenzerñ manzerñ imi momacnec bisinimmanñ zé iwac humuc imi ninñtohoma <sup>11</sup> Imuhuc me imuhuc wamma humuc ic sugina igucnec yacma kekec qelia mihicñimanñ zé wanzua.

*Kekecac qambaña hémma  
usuñnec kembij.*

<sup>12</sup> Ni nena imi bec mihicñizua ménda zézua. Wanñu bec mesolanñani wanñ néñec ménda zézua, néñ Kristo Yesunéñ ni népésiyec séc imuac mihicñimanñ zé wamma usuñnec kemmanec keczua. <sup>13</sup> Dacmuna hécna, ni bec imi mezua zéma ménda ninzua, néñ iwawai andénaiguc hezac imuac elunñ nuyu, iwawai wésénaiguc hezac imuac memañ zé <sup>14</sup> kemma añgétimanñac hezac, imuac mia kicna hiwa keñu Kristo Yesuac qeriaiguc Anutunéñ ounec héihéré néñec imuac héla haiyu hezac imuac memañ zé usuñnec kenzua. <sup>15</sup> Imuac solaññanima keczij neñañ sucninaiguc ménñéñ ménñ yomuhuc nimmacac hezac; Haka ménñac ini ninñgic tanera ménñ wanñ Anutunéñ imi acguc measari énécmiyu hémmu. <sup>16</sup> Nini añgétima keczij hénac imuacnec sac tima kembij.

<sup>17</sup> Dacmuna hécna ini eñawu ni méndac némmu. Wanñu ic tosia haka kekecninaiguc hénzu séc imuhucyanec wamma kecanzu ionac haka imi acguc kic hihi wamma hémmu. <sup>18</sup> Ni hatac sasala énézéyi. Deguc acguc kic masina mayu énézézua. Ic embac sasala imi Kristoac ic

héngeŋa wéndara imuac hazéc wamma keŋha wanzu. <sup>19</sup> Ieneŋ imi tetecgiaiguc kisikiyoŋ mi-hicŋimu. Ionac anutu imi tomeŋgina. Gamuginanéŋ zunzariŋ éséc nec hai hoturu wamma baecac iwawai niŋac niŋanzu. <sup>20</sup> Waŋu neŋaŋ imi kurumeŋ ama miŋina wamma kecni qacnina ou kurumeŋiguc ooyawac hezac. Imuarunec mia aŋgéŋ titi miŋina Miŋ Kewunina Yesu Kristo hamac zéma mambéc kecanziŋ. <sup>21</sup> Inéŋ iwawai moczoŋ énézéyu niŋtoho mimuac séc kuc buŋa hemizac. Kuha imuhucyanéŋ séwinina maqeqeya imi melenéŋ nénécmiyu eŋeya séwiya edamuyaguc éséc nec wambiŋ.

## 4

<sup>1</sup> Imuac nuac niŋkumu, dacmuna sorochéna, nuac ségiségi zéma ic kewuac soroc, ini imuhucyanec Miŋ Kewuninawac qeriaiguc namma kecmu.

### *Memeseli ac.*

<sup>2</sup> Ni Yuodia zéma Sintike embac éréhéca imi Miŋ Kewuninawac qeriaiguc ewa momac wamma kecmuac niŋac zénaŋgé érécmizua. <sup>3</sup> Waŋu ai momacna\* solaŋa guac welec génzua. Embac tosara buŋa suruc hiabiawac niguc momac nec seliseli wamma ai megic imi zéma Klemento zéma nuac ai momac héca méra énécmiŋa, qacgina imi kekecac kiwiiguc hedaczac. <sup>4</sup> Miŋ Kewuninawac qeriaiguc nalé séc ségiségi waŋgic. Ménguc énézéwa ségiségi wammu. <sup>5</sup> Onac ewa bénzéŋgina imi ic embac énézégic nindacmu. Miŋ

---

\* **4:3:** Girik aciguc; boŋ zura momac nec huama kekeru.

Kewuninanén hosucgé nénécmizac. <sup>6</sup> Iwawai ménac mén ménda niñyéwérimu, néñ ai hénia héniaiguc zéwelec zéma zéqesiqesi ginanéñ ewa hia ac ézéma Anutu ézému. <sup>7</sup> Imuhuc wanjic bec Anutuac luae niniñginawac séha ogicogicya imuhucyanén Kristo Yesuac qeriaiguc onac ewa qerigina zéma niniñgina galeñgé énécmimac.

<sup>8</sup> Dacmuna hécna metecgéma zéwa, iwawai héla, iwawai téréya, iwawai dindiña, iwawai solaña, iwawai siñ niñmimiawac séc, iwawai zézé sorocyaguc, iwawai méra énécmimiawac séc me iwawai mepé qepésiyaguc, imuhucyawac wamma kecmu. <sup>9</sup> Ini nuac murunec niñareñgégic me megic me héngic imuac wamma kecmu. Imuhuc wanjic luaeac Anutunén iniguc momac-nec kecmac.

*Filipo hénarinj ewa hia ac ézéc.*

<sup>10</sup> Ini nuac nimma kecgic imuac zariñanéñ hutuzac imuac ni Miñ Kewuninawac qeriaiguc ségiségi kunéñ yanda wanzua. Becnec ini niñnéngic, néñ imuac naléya ménda hayu osigic.

<sup>11</sup> Ni iwawai mén niñac wamma imuhuc ménda zézua. Ni kekecac hénia kuamuma haka hénia héniaiguc hia zéma nimmañac séc wanzua.

<sup>12</sup> Ni imi maqeqena iguc hia kecmañac séc, wañu iwawaina samén bipiyaguc hia kecmañac séc. Imuac haka hénia héniaiguc nimba sécgé néñanzac. Yaka niñ humu humuiguc me iwawaina samén bipiyaguc me maqeqena iguc dimuhuc kecba hiarumac imuac hénia imi niñtegicdaczua. <sup>13</sup> Meseli néñanzac iwac

qeriaiguc ni iwawai moczoŋ hia wandacmaŋac séc. <sup>14</sup> Waŋu ini nuac qenzen manzenjiguc momacnec toroqezu imuac nimba sécgézac.

<sup>15</sup> Filipi ic zéwa niŋgic, becnec buŋa suruc hiabiawac ai imuac nalé hénihéniaiguc ni Makedonia baec waima kemba méŋnéŋ méŋ méra ménda néŋec, néŋ ini sac méra néŋgic imi ini ninzu. <sup>16</sup> Waŋu Tesalonika ama areŋa yandaiguc keru nalé imuaru acguc ini hatac éréhécnéŋ méŋ méra néŋgic. <sup>17</sup> Ni sese méŋ niŋac ménda welec énécmizua, néŋ mériaŋginaguc wammu niŋac onac muru haka hiabiawac hélanéŋ saima hemac niŋac imuhuc zézu. <sup>18</sup> Nuac muru imi iwawai moczoŋ sasala henéndaczac. Epafirodito mériaiguc iwawai néŋgic imi mewa sécgénénzac. Imi mia hofac oo ésécnec héméŋa hiabia waŋu Anutunéŋ memacac séc waŋu ségiségi mihični mizac. <sup>19</sup> Nuac Anutunanéŋ Kristo Yesuac qeriaiguc, edamuyawac qeriaiguc, eŋeya hofi yanda kuaya qeqeya igucnec sécgina tiénécmimac. <sup>20</sup> Anutu Maŋgocnina iwac muru nalé tetecgia qahac mepé qepési hemimac. Hélacnec!

*Ac tetecgia zéma mozoc ac.*

<sup>21</sup> Ic embac téréya Kristoac qeriaiguc kecanzu ionac yaizézé ac énézému. Dacmuna tosara niguc keczu imi eneŋ onac yaizézé ac énézéu. <sup>22</sup> Ic embac téréya moczoŋ onac yaizézé ac énézéu. Waŋu ionac sugginaiguc Kaisawac amaiguc areŋhéra ionac murunec tosanéŋ imuhucnec yaizézé acgina zézu imi meyacma

zéwa ninzu. <sup>23</sup> Min Kewunina Yesu Kristoac ewa hianéj onac ewa qeriginaiguc hemac.

**SISIPAC AC QJELIA**  
**The New Testament and Psalms in the Kube Language**  
**of Papua New Guinea**  
**Buk Song na Nupela Testamen long tokples Kube long**  
**Niugini**

copyright © 2012 Global Bible Translators

Language: Mongi (Kube)

Translation by: Global Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-23

---

PDF generated using Haiola and XeLaTeX on 11 Nov 2022 from source files dated 9 Oct 2020

0403b50f-078d-52e2-a203-056e8a430665